

Min quien.

Min quien, y'a des ys comme des pernes. In dirot toudis qu'y va vous dire : « Approche et' guife, j'vas t 'faire eune lèque ».

Min quien, quind y'est à l'cour ou dins ch'gardin, y s'roule dins cheule bédoule et quind y arvient, y m'ravisse d'un air ed dire : « A ch't'heure, t'as pus qu'à printe eune loque pou m'nettuyer. ».

Min quien, ch'est min comarate ed ches bons et d'ches mauvais jours. M' femme alle dit toudis : « In dirot qu'ch'est frère que té n'as pont eu ! A cha près qu'tin frère y n'arot jamais piché dins ch'gardin, ed'vint ches gins ! ».

Min quien, y pinse comme mi. Y'a quère à minger, à faire l'indoule, à faire el vieau pindint des heures...

Min quien, quand y va s'in aller, j'vas braire comme eune vague. Comme un jon-ne d'aloutte qu'y arot perdu l'cacheron de s'toupie.

Min quien, y s'ra interrè dins ch'gardin d'ù qu'y avot si tant quère à picher, au pied de ch'pommier, au tiot matin, quand personne y pouvot nous vire et qu'cheule journée alle queuminchot pour nous deusses, rin qu'pour nous deusses.